

Tim na vul betg pli esser Tim

da Wölfel Ursula

Tim è sa rendì in di tar ses bab en il lavuratori ed ha ditg:

«Jau hai prest anniversari!»

«Tge giavischas lura?» ha il bab dumandà.

«Ah, atgnamain nagut», ha Tim respundì. «Jau na vuess be mai pli esser Tim.»

«Ti avessas franc gugent in auter num», ha il bab respundì. «Jau ponderesch in auter num per tai. Forsa Adolar? Ubain Dagobert? Quai è num fitg enconuschents tar nus e quai tuna bain. U forsà in num tut nov. Forsa numn jau tai Poleschet? Ubain lura Chiculi Chiculatorios?»

Tim fascheva ina tschera trista ed ha ditg:

«Ti na chapeschas betg mai, bab. Jau na vi betg in auter num. Tim plascha stupent a mai. Jau na vuess simplamain betg pli esser jau. Jau vuess esser in auter mat.»

«Hm», ha il bab fatg ed ha sgrattà in'ureglia. «Quai n'è betg uschè simpel. Co vuessas lura esser?»

«Grond!», ha Tim ditg. «E satigl! En scola hani chantà oz ina chanzun sur da mai. Quella tuna uschia:

Tim sco in butschin

è sin in puntin.

Il puntin quel va en tocca

e noss Tim quel è 'na clocca.

Quai han els inventà. Tuts han chantà e suenter hani ris ora mai. Jau hai gì ina gritta da schluppar.»

«Ti has fatg in sbagli», ha il bab manegià. «Ti avessas era stuì rir cun ils auters. - Jau crai ch'igl era ina giada in retg cun il num Tim, il Gross. La glied fascheva adina versets e chantava chanzuns per rir ora il retg. Ma quel be rievà e chantava cun tschels. El era adina legher e fitg bunatsch e perquai ha el maridà ina bellezza princessa. Quella era gist il cuntrari dal retg. Ella era satiglia e bain creschida. Els han gì sis uffants. Trais prinzis satigls e trais princessas grossas e radundas. E quels uffants eran adina da buna luna.»

Tim dentant n'era insumma betg cuntent. «Jau na sun tuttina betg in retg» ha el ditg cun in tun da grit. «Sche jau fiss in retg, alura laschass jau dar schlops a tut ils uffants impertinents! Ubain ch'jau prendess mes chaval e chavaltgass lunsch, lunsch davent. Ma jau stoss adina star qua e laschar rir ora mai. Jau sun be il figl d'in pover chalger.»

«Aha!» ha il bab ditg. «Jau crai che ti vuessas auters geniturs! I vegn adina mender!»

Cun ses maun ha el spalà ils chavels.

«Na, na!» ha Tim clamà. «Jau hai tuttina fitg gugent vus. Jau na vuess mai e pli mai auters geniturs!» Ed el ha dà in bitsch a ses bab. «Vesas qua!» ha il bab ditg riend.

«E nus na vuessan mai e pli mai in auter Tim! A nus plaschas ti il pli bain da tut ils uffants sin quest mund.» Ed il bab ha agiuntà:

Tgi che ri ora mai,

na guarda betg sin sasez;

guardass el sin sasez,

na riess el betg ora mai.